



01 JUN, 2020

Peniaga kecil perlu bantuan wang

Sinar Harian, Malaysia

Peniaga kecil perlu bantuan wang

Kerajaan diminta tangani segera masalah dihadapi golongan berkenaan

Oleh NORSHAHZURA MAT ZUKI

Usahawan perusahaan kecil dan sederhana (PKS) mikro di Malaysia memerlukan bantuan kewangan untuk meneruskan perniagaan sedia ada berbanding beralih ke bisnes baharu, kata Setiausaha Biro Niaga Muda Gabungan Malaysia, Qairy Maheran.

Menurutnya, berdasarkan data diperoleh pihaknya, sebanyak 146,390 ahli Gabungan Persatuan Penaja Peniaga Kecil Melayu Malaysia (Gabungan Malaysia) didapati terjejas susulan Perintah Kawalan Pergerakan (PKP) akibat penularan koronavirus (Covid-19).

Katanya, Kedah merupakan negeri paling terjejas iaitu sebanyak 15 peratus, diikuti Perak (14 peratus), Johor (12 peratus), Selangor dan Pahang (10 peratus), Kelantan (8 peratus), Melaka (6 peratus), Terengganu dan Negeri Sembilan (5 peratus), Wilayah Persekutuan dan Sarawak (4 peratus), Perlis (3 peratus), Pulau Pinang (2 peratus), serta Putrajaya dan Sabah (1 peratus).

"Kluster perniagaan mikro yang paling teruk terjejas adalah penjaja tepi jalan tanpa premis dan peniaga premis tetap iaitu sebanyak 22 peratus, penjaja pasar malam dan pasar tani (21 peratus), pengeluar produk dari rumah (12 peratus), jualan dalam talian dan perkhidmatan (11 peratus), peniaga premis tetap pihak berkuasa tempatan (6 peratus), medan selera dan bazar uptown (4 peratus) dan peniaga kenderaan saji (2 peratus).

"Ahli Gabungan Malaysia ini perlu diberikan suntikan bantuan kewangan untuk meneruskan perniagaan sedia ada kerana permintaan perkhidmatan terhadap sektor jualan makanan sentiasa tinggi," katanya kepada *Bisnes Sinar*.

Beliau berkata demikian ketika mengulas kenyataan Timbalan Menteri Pembangunan Usahawan dan Koperasi (MEDAC), Datuk Mas Er-

mieyati Samsudin baru-baru ini yang menjelaskan sebanyak 92.1 peratus usahawan di negara ini memerlukan bantuan kewangan bagi menceburi perniagaan baharu.

Dalam kenyataan berkenaan, Mas Ermieyati berkata, sebanyak 40.45 peratus usahawan memerlukan khidmat nasihat dan bimbingan perniagaan permulaan serta 31.46 peratus lagi memerlukan latihan asas keusahawanan.

Katanya, jumlah itu diambil berdasarkan laporan Kaji Selidik Covid-19 dan PKP terhadap usahawan yang dilakukan oleh SME Corp Malaysia.

"Sehingga kini, jumlah usahawan PKS yang berdaftar di Malaysia adalah sebanyak 907,065 syarikat dan 186,855 daripadanya atau 20.6 peratus adalah usahawan PKS wanita.

"Kami dapati daripada jumlah itu, 8.85 peratus perniagaan gulung tikar dan 91.15 peratus mampu meneruskan perniagaan. Sebanyak 58.55 peratus lagi bersedia menceburi bidang baharu sementara 41.45 peratus adalah sebaliknya," katanya.

Cadang strategi khusus

Sementara itu, Setiausaha Agung Persatuan Tunas Usahawan Nasional (Pertunas), Nurliana Muhammad berkata, pihaknya mencadangkan agar kerajaan mewujudkan satu strategi khusus pasca-Covid-19 bagi memulakan proses pemulihan yang lebih berkesan untuk jangka sederhana dan panjang.

"Strategi khusus ini penting bagi memastikan kelangsungan perniagaan usahawan PKS dalam tempoh enam hingga 12 bulan akan datang menampakkkan hasilnya.

"Strategi yang mampan mampu membantu memastikan aliran tunai syarikat dapat dipulihkan dan peluang pekerjaan kepada rakyat dapat dikembalikan.


"Pendekatan haruslah dilakukan secara menyeluruh terutamanya jangkaan kemelesatan ekonomi dunia yang sudah pasti akan menjadi lebih teruk kerana kita tidak boleh membuat andaian Covid-19 ini akan berakhir dalam masa terdekat atau pada penghujung tahun ini," katanya.

Menurutnya, kerajaan juga perlu memperkasa agensi seperti SME Corp Malaysia yang diwujudkan untuk menyelaras dan mengkoordinasikan program berkaitan usahawan bagi memastikan pembiayaan sampai kepada sasarannya.

Dalam pada itu, beliau berkata,



Gabungan Malaysia berpendapat usahawan mikro memerlukan bantuan kewangan untuk meneruskan perniagaan berbanding beralih ke bisnes baharu.



Carta menunjukkan peratusan usahawan mikro yang terjejas akibat Covid-19 di bawah Gabungan Malaysia mengikut negeri.

pihaknya turut menyambut baik peruntukan MEDAC sebanyak RM452.8 juta dalam pelan pemulihan PKS pasca-Covid-19 yang menggariskan enam strategi utama bagi menyokong kestabilan ekosistem keusahawanan.

Perinci syarat pinjaman

Bagaimanapun, beliau mendakwa Pertunas mendapati kebanyakan program yang dinyatakan lebih kepada kompilasi program sedia ada dan bukan program khusus.

Di samping itu, jelasnya, pelan juga tidak menyatakan secara khusus agensi mana yang bertanggungjawab menguruskan permohonan usahawan.

Pengerusi Hal Ehwal Usahawan, Persatuan Alumni UiTM Malaysia (PAUiTM), Ahmad Muzakir Hamid pula berkata, kerajaan perlu memperincikan syarat yang dikeluarkan oleh institusi perbankan berhubung bantuan kewangan disalurkan.

"Hingga ke hari ini mereka masih menggunakan syarat yang hampir sama dengan pinjaman sebelum Covid-19, antaranya CITOS dan CCRIS diambil kira dan penyata bank mesti mempunyai rekod yang baik.

"Rata-rata usahawan tidak berpuas hati kerana ada antara mereka yang sudah pasti mempunyai rekod kurang baik," katanya.

Beliau turut mencadangkan agar kerajaan membenarkan usahawan mikro kembali menjalankan perniagaan bagi menjaga aliran tunai.

Bagaimanapun, katanya, prosedur operasi standard (SOP) perlu ketat supaya tidak menyalahi PKP.

"Ada usahawan khususnya PKS mikro seperti pasar malam dan pasar tani yang tidak dibenarkan berniaga.

"Mereka ini mempunyai wang tunai dalam tangan hanya cukup untuk meneruskan operasi jika keadaan berlarutan kurang tiga bulan," katanya.



01 JUN, 2020

Peniaga kecil perlu bantuan wang

Sinar Harian, Malaysia

Page 2 of 2

SUMMARIES

Kerajaan diminta tangani segera masalah dihadapi golongan berkenaan

Usahawan perusahaan kecil dan sederhana (PKS) mikro di Malaysia memerlukan bantuan kewangan untuk meneruskan perniagaan sedia ada berbanding beralih ke bisnes baharu, kata Setiausaha Biro Niaga Muda Gabungan Malaysia, Qairy Maheran. Menurutnya, berdasarkan data diperoleh pihaknya, sebanyak 146,390 ahli Gabungan Persatuan Penjaja Peniaga Kecil Melayu Malaysia (Gabungan Malaysia) didapati terjejas susulan Perintah Kawalan Pergerakan (PKP) akibat penularan coronavirus (Covid-19).